

眼曰

薛經曰目者五藏六府之精榮衛魂魄之所常營也神氣之所常主也又曰諸脈者皆屬於目目得血而能視五藏六府精氣皆上注於目而爲之精故白睛屬肺黑睛屬肝瞳人屬腎上下胞屬脾兩眦屬心而內眥又屬膀胱五藏五色各有所司心主赤赤甚心實熱也用導赤散赤微者心虛熱也用生犀散肝主青青甚者肝熱也用瀉青丸淡青者肝虛也用地黃丸脾主黃黃甚者脾熱也用瀉黃散淡黃者脾虛也

用異功散目無睛光及白睛多黑睛少者肝腎俱不足也用地黃丸加鹿茸晝視通明夜視罔見者因稟陽氣衰弱遇夜陰盛則陽愈衰故不能視也用中和養胃湯凡赤脈翳物從上而下者屬足太陽經用東垣選奇湯從下而上者屬足陽明經用局方流氣飲蓋翳膜者風熱內蘊也邪氣未定謂之熱翳而浮於外邪氣已定謂之冰翳而沉於內邪氣既深謂之陷翳宜升發之退翳之藥佐之若上眼皮下出黑白翳者屬太陽寒水從外至內者屬少陽風熱從下至上綠色者屬足陽明及肺腎合病也疳眼者因肝火濕

熱上衝脾氣有虧不能上升清氣故生白翳睫閉不
開眵淚如糊久而膿流遂至損目用益氣聰明湯茯
苓瀉濕湯及四味肥兒丸目閉不開者因乳食失節
或過服寒涼之藥使陽氣下陷不能升舉故目不開
用柴胡復生湯若胃氣虧損眼睫無力而不能開者
用補中益氣湯暴赤腫痛者肝火熾盛也用龍膽瀉
肝湯多淚羞明者肝心積熱也用生犀散亦有肝腎
虛熱者用地黃丸風沿爛眼者膈有積熱也用清胃
散時時作痒者濃潰生蟲也用點藥紫蘇膏眼睫連
劄者肝經風熱也用柴胡清肝散若生下目黃壯熱

大小便秘結乳食不思面赤眼閉者皆由在胎時感
母熱毒所致兒服瀉黃散母服地黃丸若乳母膏粱
積熱致兒目黃者令母服清胃散若肢體面目爪甲
皆黃小便如屋塵色者難治又有痘疹後餘毒未盡
上侵於目者屬腎肝虛也用滋陰腎氣丸前證多宜
審治其母兼調其兒

初生眼不開

胎赤

並見初
生門

目赤腫痛會熱極挾風則目赤腫痛晝夜不開驚啼
不已先用九仙散水薑葱煎服次三解散溫米泔水

調下及點以黃連膏

若夫天行時證暴赤腫痛晝

夜苦甚久則昏矇治法先以九仙散解表次以小柴
胡湯去半夏加大黃薄荷竹葉生地黃水煎服併投
草龍膽散及點以黃連膏貼以清涼膏 有孩兒胃
氣素虛脾氣實盛眼胞赤腫羞澀不開遽投苦寒之
劑以退赤腫反傷脾胃不吐則瀉或四肢微冷復以
溫藥調治則目疾轉加宜先用咬咀五苓散水薑燈
心煎服次投瀉黃散自愈 有心脾蘊熱經久及肝
受邪熱致兩目羞明眼胞浮腫微有紫色大腑閉或
流利小便澀或通順先以百解散發表次投明目飲

自然平復仍忌酒葷三五日 有小兒薄劣多致塵埃入目揩摩成腫發熱作痛啼哭不已宜用辟塵膏治之立效

湯導赤散 治心熱小便赤眼目赤腫

赤芍藥

羌活

防風

各半兩

大黃

甘草

各壹錢

右爲末燈心黑豆同煎食後服

余平生無赤眼之患用之如神大人小兒可通用凡眼赤澀之初只用自已小便張目溺出用一指接抹眼中便閉目少頃卽効此以真氣逼去邪熱也

治小兒赤熱腫眼

大黃

白礬各等分

右爲末同冷水調作罨子貼眼立効

小防風湯 治小兒熱毒眼患

大黃

蒸

山梔子

甘草

炙

赤芍藥

川當歸洗

防風

羌活各等分

右剉碎每服五錢水一鍾煎至五分食後服

小流氣飲 治小兒風毒眼患

蟬蛻

去足

甘草

羌活

天麻

川當歸

防風

大黃

薄荷

赤芍藥

杏仁

各等分

右判碎每服五錢水一鍾煎至五分食後服

小菊花膏

治小兒積毒眼患

黃連

黃芩

大黃

菊花

羌活

蒼朮

米泔浸

荊芥穗

防風

右各等分爲末煉蜜和膏如小指頂大每服一餅細嚼白湯嚥下不拘時服

通頂散 治眼疼、風熱腫脹作楚

瓜蒂

藜蘆 各壹錢

皂角肉 半錢

麝香

少許研

右爲細末研勻每少許吹入鼻中

九仙散 解諸目疾不拘歲月遠近並宜先服

柴胡

去蘆

蒼朮

米泔浸刮去麁皮剉炒燥各貳兩

赤芍藥

荆芥

甘草

各陸錢半

麻黃

剉去節湯泡瀝焙乾

川芎

薄荷

連梗各半兩

旋復花

去老梗叁錢

右碎每服二錢水一盞薑二片葱一根煎七分不

拘時溫服

三解散

一名寧心湯

主上焦蘊熱傷風面紅目赤狂躁

氣急渴水驚啼煩悶丹毒口瘡痰搐掣

人參

去蘆

防風

去蘆

天麻

茯神

去皮木

鬱金

無以山梔仁代

白附子

大黃

各貳錢半

赤芍藥

黃芩

僵蠶

各伍錢

全蝎

拾伍尾去尖毒

枳殼

水浸去瓢麩炒貳錢

粉草

陸錢

右焙爲末每服半錢至一錢用薄荷湯無時調下

或燈心湯

草龍膽散 治暴赤火眼晝夜澀痛作腫淚多

草龍膽

木賊 去節

荊芥

菊花

防風 去蘆

草決明 半生半炒

甘草 柴味各半兩

右剉每服二錢水一盞煎七分無時溫服痛甚加

羌活乳香同煎

明目飲 治心脾蘊熱肝受風邪致兩目羞明經久

不瘡

山梔仁

淨香附 各壹兩 夏枯草 去梗半兩

右剉每服二錢水一盞蜜一匙煎七分無時溫服

金波散 治時行赤眼腫痛成翳有熱多淚

淨黃連 壹兩

鵬砂

寒水石

大黃 各貳錢

海螵蛸

銅青 各壹錢

元明粉 貳錢半

全蝎 去尖毒柒枚

麝香 壹字

右除元明粉麝香餘七味剉晒爲末仍入元明粉麝香乳鉢內同前藥末杵勻每用一字至半錢溫淨湯或涼水調化澄清去滓無時頻洗有風夾蟲作痒入輕粉取効仍忌酒葷三五日

黃連膏 治時行火眼赤腫澀痛晝夜煩啼

淨黃連 貳錢半

右件細剉雞子一枚筋觜札開一頭大處取清瓦
盞盛入黃連和勻釀一時見黃色以絹濾過成膏
患者仰面卧外令人挑一字許頻點目內覺口中
有苦味滿舌上藥之驗也豆瘡餘毒攻眼眇多有
熱用之驗

清涼膏 治暴赤火眼腫痛及血癰作疼發熱

大黃

淨黃連

黃檗

赤葛

細辛

和葉

薄荷葉

風化朴硝

柴味各壹兩

右前六味或晒或焙爲末臨入朴硝乳鉢內同杵

勻每用一錢至二錢冷水加薑汁調塗太陽或新
汲井水調妙熱癰以涼米湯水調搽患處

辟塵膏 治小兒塵埃入目揩成腫熱作痛啼哭不
已

右以油煙細墨新汲井水濃磨入元明粉半錢和
勻爲膏用筆多點目內三五次卽効仍忌飲酒一
晝宵

速効飲 治長成小兒因他物或跌着觸損兩目血
脹腫痛

荊芥穗

薄荷葉

微炒

草決明

微炒各
壹兩

甘草 參錢生用

右爲麤末和半生半炒芝麻等分抄二錢掌中盛乾嚼之味盡吐去相如此法投三五次卽効

薛一小兒目赤作痛咬牙寒熱余謂肝經風熱用柴胡飲子一劑而赤痛止又用四物參芪白朮柴胡而寒熱退又用補中益氣湯而飲食加 一小兒眼素白或青患眼赤作痛服降火之劑眼如血貫脈洪大或浮緩按之皆微細用十全大補湯加柴胡山梔數劑外證漸退而脈漸斂又數劑而愈 一小兒患眼赤痛服大黃之藥更加寒熱如瘧余謂脾胃復傷用

四君升麻柴胡炮薑釣藤鈎而寒熱愈又用補中益氣湯間服而目疾痊 一小兒目痛恪服瀉火治肝之藥反加羞明隱澀睡中驚悸悲啼此肝經血虛火動傷肺也用五味異功散加山梔補脾肺清肺金用地黃丸滋腎水生肝血而安仍兼服四味肥兒丸而痊

龍膽瀉肝湯

方見疳

生犀飲

方見心

生熟地黃散

治眼初患之時因悞築打觸肝受驚

風致目腫赤痛痒

生地黃

洗

熟地黃

各壹兩

麥門冬

去心伍錢